

四明叢書

張宗祥



純德彙編卷四

六十世孫華鈞重訂

祀典

邑廟典禮

邑祭始於漢延光三年六月命卽故居立祠崇祀其規制不可考宋慶元二年邑令朱堂始以上巳重陽日行三獻禮及明太祖正祀典定六月六日孝子誕辰郡守設奠然不久遷像建祠于郡而邑遂廢享正德十年邑令胡瓊詳請監司并定祭銀四兩於縣賢隙地建崇孝

祠設栗主祀之嘉靖二十二年邑令陳良廣葺學宮議別建孝子廟暫奉主入鄉賢祠而改崇孝祠爲敬一亭會陳內召去祠不果建專祭亦停萬曆四十年後裔允升呈請巡撫高舉復建祠邑南門內歲以二月十三日致祭係孝子諱日也崇禎十五年允升之弟允茂呈請巡撫董象恆復秋祭於丁後一日舉行本朝康熙十年後裔爾宏呈請布政使袁一相定春秋二祭銀七兩載入慈谿縣賦役全書

孝子神前正祭官備 春祭二月十三日 秋祭八月

丁後一曰

啓孝祠神父母追祀 于姓以春秋祭孝子日設奠
祭品祭儀具詳家乘

祭文

維某年八月某朔越某日慈谿縣知縣某等謹以剛鬣
柔毛之奠致祭於敕封漢孝子之神純德徵君董公之
前曰惟神德隆將母誠在格天汲水奉養沈疴頓痊斬
仇辭爵經義卓然慈因孝著邑以溪傳封神廟食特典
綿延茲逢春秋仲敬潔几筵洋洋神爽於萬斯年尚饗

啓孝祠祭文

維某年二月某朔越某日裔孫某等謹以庶饌之奠致祭於五世祖懋齋府君五世祖妣黃氏敕贈賢淑夫人之前曰猗與我祖道積厥躬友于兄弟樹孝子風維我祖妣節與慈崇清貧足樂晬然其容山浮草碧溪漾花紅溯厥淵源賢淑褒封恩隆上祀家祭則同霜零露濡俎豆闕宮洋洋在上鑒茲微衷尙饗

郡廟典禮

郡祭始於洪武二年五月詔封董孝子之神命每歲六

月六日知府率僚屬致祭用剛鬣太守張琪隨於四年
遷像改祀于郡自此定祭銀四兩并給門夫一名銀二
兩鄞縣出辦萬曆三十年推官何士晉以神父母無祀
非孝子心詳請監司又行鄞縣會議定祭銀一兩二錢
以六月六日正祭未行之先府委教官一員向後閣設
奠然後隨班正祭其孝子及父母銀具載鄞縣賦役全
書

孝子神前正祭官備 六月六日設奠

後閣神父母追祀 同日官備

祭品祭儀具詳廟志

祭文

維某年夏六月某朔越六日某寧波府知府某等謹以
剛鬣乘盛之奠致祭於敕封董孝子之神前曰惟神孝
本天性子職孔虔汲水養母沈疴頓痊鄰母之子誓不
其天待時斬首祀母雪冤累徵不起守志維堅錫類之
孝愈遠愈宣某等來官茲郡風化宜先恭承祀典罔敢
或愆今逢華誕敬潔几筵洋洋神爽百世弗諼尙饗

後閣先祭文

維某年夏六月某朔越六日某寧波府知府某等謹以
牲醴之儀致祭於漢孝子父母董公董母之神曰維神
篤啓賢孕純孝格天仁以錫類勇以雪冤光明俊偉今
昔竝傳追厥所自嚴父淑媛某等叨守茲土景仰最先
特揚憲道以表前賢邀神之貺永綏萬年尙饗

附宗祠家祭

神誕六月六日設奠 子姓世祀鄞族同

黃楊奧祭孝子墓 穀雨日鄞慈合祭

祖關祭孝子父母墓 三月三日子姓世祀

祭品祭儀具詳家乘

六月六日世祀文

維某年夏六月某朔越六日某裔孫某等謹以柔毛清酌之儀致祭於敕封漢孝子之神純德徵君六世祖之前曰疇非人子惟祖孔虔疇無孝道惟祖克傳汲溪水涌味符隱泉揆厥所自誠以格天鄰兒僂母抱恨弗諼仁以錫類勇以洩冤母靈旣慰浮生可捐欽恤命下終獲歸全蒲輪寵賁視若遺蟬閔曾嬾美姜蔡比肩猗歟德不泯兮慈水清漣名不朽兮豐碑滿阡懸弧有祀諭

祭崇焉凡我子姓寧敢或愆用薦牲醴裸獻几前惟祖
錫福億萬斯年尙饗

黃楊奧祭墓文

維某年某月某朔越某日某裔孫某等謹以柔毛清酌
之奠致祭於六世祖敕封漢孝子之神純德徵君六世
祖妣周氏夫人之墓前曰於惟我祖純孝孔彰殲仇辭
爵潛德彌光考終邑里卜兆黃楊妣祔其右從以偕臧背
山面湖縈溪竝潢碑題屹立松楸鬱蒼茲感春露追遠
寧忘翦荆拜墓祀事裔皇惟祖有赫如在洋洋子孫勿

替山高水長尙饗

祖關孝子父母墓祭文

維某年三月某朔越某日某裔孫某等謹以柔毛清酌之奠致祭於五世祖懋齋府君祖妣賢淑夫人之墓前
巨追維祖德孝啓於慈緬想宗功養終於葬縈泉漾碧依然滴淚之潭樾蔭含青猶是手栽之樹千萬年特標古墓百六日又屆清明用列豆遵敬申拜埽伏願罔恫罔怨庶昭麥飯之惟馨爾熾爾昌永錫瓜瓞以多福敢告

楊慈湖先生代朱邑宰祭董孝子文

維慶元二年三月三日從政郎慈溪縣令朱堂率僚佐等謹以雞黍之儀致祭於漢董孝子敕封純德徵君而言曰夫孝人心之所同鬼神之所同徵君用此心於千載之上邑之人敬而奉之於千載之下豈惟邑之人敬而奉之一郡之人敬而奉之豈惟一郡之人敬而奉之際天所覆凡在人倫中者有所不知知則孰不敬而奉之嗚呼至矣是謂至德是謂要道是謂人心之所同惟徵君有神惠相之俾堂暨茲在位永保所自有之本心

以對越明神以對越上帝敬告

楊簡字敬仲號慈湖邑人第乾道五年進士官富陽
主簿遷樂平令內陞國子博士值趙汝愚罷相上書
請留坐斥時慶元元年也自此閒居十三年嘉定初
復起祕書郎遷少監累工部侍郎將作監奉祠理宗
登極再召不起以寶謨閣學士致仕壽八十六而終
簡學宗象山非禮不動宋史所謂四弟子之一謚文
元 朱堂履歷未詳縣志所載惟慶元元年修學宮
并增置泮池門扉而已

烏馬忠顯重新董孝子廟告成祭文

維延祐元年正月望後一日忠顯校尉慈溪縣達魯花
赤烏馬兒同縣尹等特以少牢果蔬之儀致祭於漢孝
子純德徵君董公之前曰慈溪僻處海隅號稱下縣然
而名賢代起歷歷有人是亦文獻之邦也考其始實惟
公篤百行之原復不共之怨聿開風氣之先固祀典所
宜首及者第俎豆歲設而廟貌廢弛爲壇野祭其何以
肅觀瞻勸齊民耶若唐孝子張公宋孝子孫公其聞公
之風而興起者乎顧并不列於祀典何歟凡此皆守土

者之責予自下車輒有志矣而未逮也既乃召集邦人
出俸金告以重新董廟意幸邦人好義爭先樂助以底
於成茲特陳牲祭告用妥公神以張公孫公侑食尙饗
烏馬兒蒙古部人皇慶初由忠顯校尉蒞慈邑在任
十三年政先教化勤惕民瘼尤多建置詳具袁桷所
爲興造記 達魯花赤猶華言長也元制以北人領
華土改府曰路設總管縣則設縣尹而郡縣俱設達
魯花赤冠總管縣尹之上以節制之

鈞按烏公乃慈邑之長故正德天啓雍正邑志雖名

宦無傳而秩官表載之嘉靖府志秩官表顧入於鄞
且列世祖至元時卽前此成化志後此雍正志皆然
然烏公於皇慶二年建慈署正廳及鼓樓府志亦載
其事與邑志同又清容先生興造記言之甚詳則秩
官表殆邑志是而府志誤

胡邑侯重舉董孝子祀事祭告文

維正德十年夏閏四月廿有八日慈谿縣知縣胡瓊率
僚屬等謹以柔毛酒醴之儀敢昭告於敕封漢孝子之
神董公純德徵君曰慈谿之邑肇於唐慈谿之名本於

漢蓋用公汲水涌泉故事也以勸孝也夫公本慈人孝能格天乃緣國初遷像祀於郡而邑遂廢享致此邦之人常爲吁咷司民牧者能毋慨然瓊叨任茲土稽之志乘而志乘有明徵詢之人言而人言有缺典是用特建三楹於縣巖詳請各憲題額崇孝祠涓今吉辰迎主奠位惟公有神實式憑之其尙永歆禋祀佑啓邦人使各惇孝道以共享太平之休尙饗

胡瓊字國華福建延平人正德六年辛未登進士越歲宰慈皇立心公恕而斷獄明審尤以振興學校爲務